

FILED

JAN 09 2018

ASST. CLERK OF COURTS
REPUBLIC OF THE MARSHALL ISLANDS

IN THE TRADITIONAL RIGHTS COURT
OF THE
REPUBLIC OF THE MARSHALL ISLANDS

RINGTON LANINMIJ,)
)
) Ri-Abnono,)
)
) VS.)
)
RAKINMETO SOLOMON,)
)
) Ri-Jumae Abnono.)
_____)

CIVIL ACTION NO. 2016-172

LEMNAK IM UAK EO AN TRC COURT EO

RO UAAN PANEL EO: Presiding Judge Grace Leban
 Associate Judge Nixon David
 Pro tem Judge Risi Graham

JIKIN RONJAKE EO: Mejit Island Local Government Council Hall, Mejit Island

RAAN IN RONJAKE KO: November 7-10, 2017

IAKWELEL KO IKOTAAN PARTY KO:

Dri abnono eo ej tomak bwe ewor ruo jeim jen jeim jati maan ro rekar kajebel lak Mejit Island, Drekwokwoj, eo im ear ilok Mejit Tu rok non e, im Lajikit, eo im Mejit Tu Eon ekar ilok non e. Jeim jati maan rein rej walok jen Leroj Libet, eo ej nejin Leroj Limenwa (Kein kamol an Dri Jumae Abnono 1). Elikin jako eo an Drekwokwoj, Taklur, eo im ej manje nejin Liwaik, ekar bok jikin. Ekkar non Dri Abnono eo, Liwaik im ro bwijjin, rekar kabjur maron in Iroiylaplap ion Mejit Tu Rok elikin jarko jein, Larron im Liowilik. Larron ekar jako ilo bata, im Liowilik ekar ilok jen Mejit im loor lak leo ibben non Maloelap. Dri abnono ej tomak bwe bwijjin Liwaik emoj an lot elikin an Lanjo jako, im bwe ien an botoktok kabjur maron im ejein lot. Dri Abnono ej bareinwot tomak bwe eo ejimwe im jejot bwe en kabjur maron in Iroiylaplap non Mejit Tu Rok ej Smith Michael, botab kinke ejab maron kabjur maron eo, ekkar bwe eo enij binej jenkwan ikijien maron eo non Iroiylaplap in Mejit Tu Rok ej Dri Abnono eo, Rington Laninmij.

Dri Abnono eo ej tomak bwe bedbed ion bwebwenato ko jen ebeben ko maan lak, ekar wor juon Lia eo im ear komon non Nino, momaan eo eritto jein jemeir, Hamilton, im kin men in, Charley Jetnil ejab maron in kabjor maron ak ba bwe ej Iroj in Mejit Tu Rok.

Ekkar non Dri Jumae Abnono eo, Laninbwij Lomouj eo ekar kajebel lak Mejit non Lojamaned Mejit Tu Eon im Luallep Mejit Tu Rok. Dri Jumae Abnono ej tomak bwe Irojlaplap Lajikit, mokta jen an jako, ekar komone kalimur eo an ilo naan non Laninbwij Lomouj, ilo an kar ba bwe Mejit enij jebel lak im ruo mottan, Mejit Tu Rok non Lojamanod (eo ej manden) Taklur im Mejit Tu Eon on Luallep (wullepen) Keju. Ej tomak eo an Dri Jumae Abnono eo bwe elikin an lot bwij, botoktok eo emoj an bok maron in Irojlaplap. Botab, emoj an ejaak juon bwij kaal elikin an lotak kora eo jinen, Emlen. Dri Jumae Abnono ej bareinwot tomak bwe ej e eo im ejimwe im ekkar bwe en kabjor maron in Irojlaplap non Mejit Tu Rok rainin, kinke ej jen bwij eo an Emlen, kora eo jinen.

KAJITOK KO REKAR ITOK NON AN TRC PANEL UAAK:

Kajitok: Won eo ikotaan Rington Laninmij im Rakinmeto Solomon, im ro rej koba lak ibbeir, bedbed ion mantin majol, ekkar bwe en kabjor maron in Irojlaplap ion Mejit Tu Rok, Mejit Atoll, Marshall Islands?

Uaak eo: Rakinmeto Solomon.

MELELE KO IM UAAK KEIN REJ BEDBED IOIER:

Eiton aolep naan in kamol ko an ri kamol ro an Dri Abnono im Dri Jumae Abnono jimor, rekar lajraak etan Irojlaplap ro an Mejit Tu Rok einwot in: Drekwojkwoj, Taklur, Lakiwa, Laninbwij, liTakinej, Lanjo, Wame im Rakinmeto, eo im ej kabjor maron eo kio im rej jumae ki. Ijelikin ro jet, Rithen Laninmij ekar kamol bwe Mejin ekar kabjor maron elikin Lakiwa im mokta jen Laninbwij. Lajrak in ej alikar ilo kein kamol eo an Dri Jumae Abnono 1, im kein kamol an Dri Abnono B. Kin men in, elikin am lukuun etale pepa kein ruo kar jaaki maan tak einwot kein kamol, ej alikar non Panel eo ke Taklur, maan nejin Liwaik, ekar kabjor maron elikin Drekwojkwoj. Elikin jako eo an Taklur, maron eo an Irojlaplap non Mejit Tu Rok ekar walal tak

non maan eo jatin, Lakiwa. Lakiwa ej eo eliktata ilo ebeben eo an, im kin men in, maron eo an Irojlaplap ekar walal tak non ebeben eo lal tak, jinoe jen Laninbwij, maan eo nejin Litereo, eo im ej kora eo eritto jen Taklur im Lakiwa. Elikin Lanibwiji, maron eo ekar ilok non Takinej, eo im ej nejin Libuninwa (ilo tore eo ej kora eo ej mour wot jatin Litereo im Taklur, im eritto jen Lakiwa). Elikin Takinej, maron eo ekar ilok non ebeben eo lal tak non Lanjo, maan nejin Neijar, kora nejin Liwome, kora jatin Litereo im Taklur, botab eritto jen Libuninwa im Lakiwa. Elikin an Lanjo jako, Wame ekar Irojlaplap non Mejit Tu Rok. Ekkar non naan in kamol ko an rikamol ro ilo case in, Lanjo ekar kommone juon an Kalimur (Kein kamol an Dri Abnono C), eo im ej kwalok ke Wame enij binej jenkwon ikijien maron eo an Irojlaplap. Wame ej maan nejin Mejin, eo im ej maan eo jatin Taklur, botab eritto jen Lakiwa. Elikin Wame, elon ro rekar ba bwe ir eo rej kabjor maron eo, im ekoba Rakinmeto Solomon, botab elikin an Council of Iroj kar etale, rekar kile bwe Rakinmeto Solomon ej e eo enij kabjor maron in Iroj einwot an alikar ilo letter eo kar je non Hemilton I. Taklur, eo im kar je ilo July 08, 1996 (Kein kamol an Dri Abnono G).

MANTIN MAJOL KO REKKAR:

- 1. Jidrak in bwij**
- 2. Manit ej ukot manit**
- 3. Lia**

ETALE EO:

Elikin ad etale kein kamol ko kar jaki maan tak ilo ien ekajet eo, ro uan Panel eo rekar komone uak ko aer einwot in. Maron eo ikijien Irojlaplap ilo Mejit Tu Rok, einwot an alikar ilo menmenbwij eo (Kein kamol an Dri Abnono 1), im menmenbwij eo kar bok jen bar juon menmenbwij (Kein kamol an Dri Abnono B), ej kalikar ke lajrak in maron eo an Irojlaplap ekar ejaak jen bwij (nejin kora) ke Drekwokwoj ear jolet maron in Irojlaplap eo an jen jinen, Libet, im elikin Drekwokwoj, maron eo ekar ilok non Taklur, maan nejin Liwaik, jinen Drekwokwoj. Elikin Taklur, maron eo ekar ilok non Lakiwa eo im ej ajiri eo nejin Liwaik emour ilo tore eo. Maron eo ekar walal tak non ebene eo lal tak im jinoe kin manje emaan eo nejin Litereo (kora jein Taklur), Laninbwij. Elikin Lanibwiji, ekar ilok non liTakinej, kora nejin Libuninwa (kora eo jatin Taklur). Elikin liTakinej, maron eo ekar ilok non Lanjo (maan nejin Neijar, eo im jinen Liwome edrik jen jinen Laninbwij, LiTereo). Bwij eo ear lot likin Lanjo, im maron eo ear ilok

non botoktok (nejin emaan). Lanjo ekar komone juon an Kalimur im jiton Wame bwe en binej jenkwon. Lanjo ekar bareinwot komone juon an Kalimur im kalikar ke elikin Wame-enaj Maikel, Ejkel, im tok elik, eo im ekkar tata bwe en kabjor maron (Kein kamol an Dri Abnono C). Panel eo ej kile ke Wame ekar kabjor maron mokta jen Michael im Ejkel kinke ej ajiri eo eliktata ej mour wot ilo bwij eo eritto, im ej wulleper. Michael im Ejkel rekar jako mokta jen ien ko aer, im kin men in, kar bukot won eo enij bok jikier im elak alikar, Council of Iroj eo ekar kile Rakinmeto Solomon bwe en e eo ekkar bwe en kabjor maron in Irojlaplap non Mejit Tu Rok. Panel eo erra ke Rakinmeto Solomon ej e eo im ejimwe im jejot bwe en kabjor maron in Irojlaplap ion Mejit Tu Rok bwe elikin Wame, ear ejaak juon bwij kaal ibben Emlen, kora eo jatin Michael, im jinen Solomon. Iomin mantin majol, botoktok emaron anjo elane bwij eo enaj lot. Botab, maron eo enij rol non bwij elane enaj lotak juon kora im enij wor nejin, eo im aolep maron renaj ilok non nejin kora eo. (Kabua, 1993). Ajiri ro nejin Emlen kar ejaak e juon bwij kaal, im Rakinmeto Solomon, manje nejin Emlen, ej e eo ejimwe im jejot bwe en kabjor maron in Irojlaplap ion Mejit Tu Rok elikin Wame. Men in ej jermal ikijien *jidrak in bwij*.

Dri Kamol an Dri Abnono:

1. Rithen Langinmij
2. Henchi Kelen
3. Rington Langinmij

Dri Kamol an Dri Juma'e Abnono:

1. Charley Langinmij Jetnil
2. Langinbo Frank
3. Bourn Frank
4. Smith Michael
5. Rakinmeto Solomon

Kein Kamol:

Kein Kamol an Dri Abnono:

1. Kein Kamol an Dri Abnono Exhibit A – Listing of wetos
2. Kein Kamol an Dri Abnono B- Genealogy made by Rithen Laninmij

3. Kein Kamol an Dri Abnono C – Lanjo’s Kalimur dated 4/18/1958
4. Kein Kamol an Dri Abnono D – Certificate of Death (COD) of Wame Taklur
5. Kein Kamol an Dri Abnono E – COD of Larim Ezkiel
6. Kein Kamol an Dri Abnono F – COD of Maikel Laninmij
7. Kein Kamol an Dri Abnono G – Council of Iroj’s letter
8. Kein Kamol an Dri Abnono H – CA 338
9. Kein Kamol an Dri Abnono I – Marshallese translation of confirmation
10. Kein Kamol an Dri Abnono J – CA 421

Kein Kamol an Dri Jumae Abnono:

1. Kein Kamol an Dri Jumae Abnono 1 – Joachim Menmenbwij dated 1909 (Original Menmenbwij)
2. Kein Kamol an Dri Jumae Abnono 2 – Majuro/Ebeye Recognition
3. Kein Kamol an Dri Jumae Abnono Exhibit 3 – Confirmation of Michael
4. Kein Kamol an Dri Jumae Abnono Exhibit 4 – Photo of Langinmij’s family
5. Kein Kamol an Dri Jumae Abnono Exhibit 5 – German Register
6. Kein Kamol an Dri Jumae Abnono Exhibit 6 – Land & Survey
7. Kein Kamol an Dri Jumae Abnono Exhibit 7 – Irojlaplap in the Marshall Islands slide photos
8. Kein Kamol an Dri Jumae Abnono Exhibit 8 – CA 1999-086 Answer

WAWEIN KO JET PANEL EO EJ LOI RAIKUJ BAR KENONO KAKE:

Abnono eo ikijien won eo ear kajebel lak Mejit bwe en ruo mottan ej juon ian abnono ko party ko jimor rekar jaki maan tak im melele ko an party ko ruo rekar oktak jen dron. Botaab, kinke abnono eo ejjab mottan kajjitok ko rekar itok non Traditional Rights Court eo non an uwaake, panel eo eban kenono kake. Dri Abnono eo ekar kenono kin juon **lia** eo ekar kommon non Nino, manje eo nejin Laninmij, eo ej jemen Charley Jetnil, im kin **lia** eo Charley Jetnil ejjab maron kabjor maron in Iroj. Naan in kamol ko an Rington Laninmij im Rithen Laninmij rej kein kamol ko kar jaaki maan tak non kamol e **Lia** eo, im court ej lo bwe ejabwe melele ko non an kalikar ak kamol ke **lia** in kenono kake ekar bok jikin.

Eliktata, Rington Laninmij im Rithen Laninmij kar jimor kamol bwe armij eo ejimwe im jejot bwe en kabjor maron in Iroiylaplap ion Mejit Tu Rok ej Smith Michael, ak kinke ejjab maron kabjor maron eo, im kinke ejjab erra ibbeiro, armij eo ekkar bwe en kabjor maron in Iroiylaplap non Mejit Tu Rok ej Rington Laninmij. Panel eo ej tomak bwe ne Michael, jemen Smith Michael ekar ejjelok jatin kora, maron eo an Iroiylaplap non Mejit Tu Rok enij kar walal tak ikijien botoktok non Smith Michael. Botaab, Michael ekar wor juon jatin kora, Emlen, eo im ekar wor nejin, im manje eo nejin ej Rakinmeto. Kin men in, maron eo ej rol non bwijjin Emlen kinke **“manit ej ukot manit”** einwot an alikar ilo mantin majol (Kabua, 1993).


Dated: January 5, 2017



Presiding Judge Grace Leban – Traditional Rights Court



Judge Nixon David – Traditional Rights Court



Pro Tem Judge Risi Graham – Traditional Rights Court